



BOSANSKOPETROVAČKI VJESNIK

Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

3. redovna sjednica Opštinskog vijeća

Dana, 15.2.2017. godine sa početkom u 10 časova, u Vijećnici je održan prvi dio 3. redovne sjednice OV.

Nakon izmjene i dopune dnevni red je usvojen, te je OV krenulo sa radom.

Usvojen je Izvod iz Zapisnika o radu OV sa druge redovne sjednice, te su uslijedila vijećnička pitanja i odgovori.

Potom su vijećnici razmatrali treću tačku, koja se odnosila na stanje u MZ Krnjeuša. Povodom ove tačke učešće u diskusiji su uzeli predsjednik MZ Krnjeuša, Mladen Jević, predsjednik Udruženja ispred MZ, Goran Radošević, a svoje mišljenje je dao i sekretar Opštine, Esmir Brković. Nakon diskusije usvojen je Zaključak u kome se informacija građana MZ Krnjeuše prima k znanju, te se zadužio izvršni organ da u što kraćem roku završi postupak o zakupu opštinskog zemljišta. Načelnik je izjavio da će prilikom donošenja odluke uzeti u obzir sve prijedloge građana MZ Krnjeuše, te u okviru svoje nadležnosti, postupiti apsolutno u duhu zakonskih propisa, iz ove oblasti.

U nastavku je usvojen izvještaj Komisije za socijalnu zaštitu i inkluziju opštine Bosanski Petrovac za 2016. godinu, kao i Plan i program rada vatrogasaca civilne zaštite za 2017. godinu.

Donesene Odluke na nastavku 1. vanredne sjednice a koje se odnose na izmjeni Odluke o platama i naknadama zaposlenika Jedinog organa uprave, kao i zabrani novog zapošljavanja državnih službenika, namještenika i radnika u Opštinskom organu, su potvrđene.

Na kraju prvog dijela, doneseno je Rješenje o imenovanju privremenog Upravnog odbora JU „Centar za kulturu i obrazovanje“. Upravni odbor čine tri člana, iz reda zaposlenih (Merima Husadžić), osnivača (Pero Banjac), a za predsjednika Jusuf Ramić. Rješenje će se primjenjivati od 28.2. 2017. godine, s obzirom da ističe mandat starog saziva, ovog tijela.

Javna rasprava o Nacrtu budžeta

Dana 10.1.2017. godine u opštinskoj vijećnici je održana Javna rasprava o Nacrtu budžeta Opštine Bosanski Petrovac za 2017. godinu, u dva termina.

Načelnik Zlatko Hujić i šef Službe za finansije, Adnan Hadžić predstavili su budžet koji u formi Nacrta iznosi 4.183.300,00 KM.

Tokom javne rasprave vladalo je veliko interesovanje od strane građana, budžetskih korisnika, predstavnika javnih ustanova i institucija. Načelnik je istakao da će biti uzeti u obzir svi izneseni prijedlozi i primjedbe koje su se čule, te biti dostavljeni nadležnim službama, potom Komisiji za budžet.

Dana, 21.2.2017. godine sa početkom u 14:30 u Vijećnici je održan nastavak 3. redovne sjednice. Na dnevnom redu su bile preostale tačke.

Na samom početku donesen je Program obavljanja usluga zajedničke komunalne potrošnje, a tačke „Pokretanje postupka za izbor i imenovanje:

- predsjednika i članova Upravnog odbora i
- direktora JU „Centar za kulturu i obrazovanje“ su skinute sa dnevnog reda.

U nastavku je usvojena Analiza potraživanja i obaveza opštine za 2016. godinu, kao i dokument „Plana parcelacije za lokaciju administrativno trgovačkog centra“, naše Opštine.

Pored toga, donesen je Zaključak o donošenju samog Plana.

Informacija o svim započetim i završenim projektima u opštini u 2016. godini je primljena k znanju, kao i Informacija o stanju i potrebama izrade prostorno-planske dokumentacije.

Usvojen je i Nacrt Prostornog plana Opštine, za period 2013-2033 godine, te je donesena i Odluka o utvrđivanju Nacrta Plana upravljanja otpadom za 2016-2020. godinu.

Donesen je i zaključak o davanju saglasnosti Načelniku opštine, da u ime osnivača preduzeća „Komunalno“ d.o.o za komunalne i uslužne djelatnosti naše Opštine potpiše Kolektivni ugovor o pravima i obavezama poslodavaca i radnika u oblasti komunalne privrede za teritoriju naše Opštine.

U toku rada OV, preispitivani su i zahtjevi političkih subjekata DNZ i Stranke za BiH povodom donesenih Rješenja o imenovanju Komisija OV na 1. redovnoj sjednici OV.

Prihvaćene su ostavke pojedinih članova, te su na ista mjesta imenovani novi.

Izvjestaj OIK- e o provedenim lokalnim izborima, Izvjestaj o radu upravnih i nadzornih odbora Javnih ustanova i Javnih preduzeća čiji je osnivač OV, nisu usvojeni, te su stari članovi istih zamjenjeni sa novim.

Isto tako, pored Javne rasprave gdje su zainteresovani usmeno mogli iznijeti svoje prijedloge, građani amandmane mogu i pismeno dostaviti najkasnije do 13.01.2017. godine.

Konačan izrađen prijedlog budžeta bit će razmatran na narednoj sjednici Opštinskog vijeća.



Javna rasprava u Vijećnici...

Usvojen Budžet Opštine za 2017. godinu

Dana 30.1.2017. godine sa početkom u 18:00 časova održana je druga redovna sjednica Opštinskog vijeća Bosanskog Petrovca.

Predloženi dnevni red koji je sadržavao četiri tačke je i usvojen. Izvod iz Zapisnika o radu OV sa 1. redovne, 1. vanredne i nastavka 1. vanredne sjednice nije usvojen zbog određenih primjedbi, te će uz izmjene i dopune biti razmatran na 3. redovnoj sjednici.

Vijećnička pitanja ni ovaj put nisu izostala, a pisani odgovori će biti dostavljeni na narednoj sjednici.

Nakon toga, otvorena je rasprava o trećoj tački dnevnog reda, koja je i najvažnija, a tiče se razmatranja i usvajanja Prijedloga Budžeta Opštine za 2017. godinu.

Vijećnici su, u nastavku sjednice, usvojili budžet za 2017. godinu u iznosu od **4.239.215,00 KM**, te Odluku o izvršavanju budžeta Bosanskog Petrovca, kako su predložene i dopunjene rješenjima iz prihvaćenih, odnosno usvojenih amandmana. Ova Odluka je donesena gotovo jednoglasno (1 protiv).



Sjednica Opštinskog vijeća

Dan nezavisnosti BiH

U Domu kulture je 28. februara, povodom 1. marta, Dana nezavisnosti Bosne i Hercegovine održana Svečana akademija u sklopu koje je i ove godine Opštinsko vijeće organizovalo Svečanu sjednicu.

Prisutnima su se obratili predsjedavajuća OV, Nikolina Simić, zaželim svima sretan ovaj bitan dan u istoriji naše domovine, a potom i načelnik, Zlatko Hujić, koji je istakao da uprkos teškim vremenima, i teškoj državi u kojoj živimo, našu opštinu oslikavaju činjenice koje potvrđuju i najavljuju razvoj koji je vidan na svakom koraku. Spomenuo je zapošljavanje stanovnika, kod domaćih i stranih investitora, navodeći Arifagić Investment, Almu Ras koja samo za početak planira zapošljavanje oko 100 žena, potom Bingo, posebno istaknuvši firmu Pirnar sa njenim direktorom Sandijem Terzićem, koja je

u toku radova na projektu i proširenju proizvodnih pogona. Ovim, poslovna zona u Gorinčanima u potpunosti opravdava svoje namjere.

Nakon prigodnih govora, uslijedio je kulturno-zabavni program. Prisutne su pokretnom igrom obradovali najmlađi i najslađi mališani dječijeg vrtića, potom učenici osnovne i srednje škole.

Smjenjivali su se, predstavljajući se pjesmom, recitacijom, folklorom, a sve to obojano rodoljubljem bosanskopetrovačke mladosti.

Svojim prisustvom svečanost su uveličali predstavnici kulturnog i javnog života naše Opštine, kao i roditelji učesnika.

Ranije, u toku dana, organizovano je i polaganje cvijeća na spomen obilježjima naše opštine.



Svečana akademija, Dan nezavisnosti



Svoj doprinos dali su najmlađi i najslađi...



...ali i oni nešto malo stariji, recitacijom...



...riječima o Bosni...



...stihovima



..narodnim kolom...



...muzikom



Kolegij načelnika i gradonačelnika USK

Dana, 10.2.2017. godine u Bihaću, u kabinetu gradonačelnika Šuhreta Fazlića, održan je prvi konstituirajući Kolegij načelnika i gradonačelnika Unsko-sanskog kantona, na kojem je prisustvovao i načelnik Zlatko Hujić.

Na dnevnom redu su bili Zakon o šumama USK, zakon o izmjenama i dopunama Zakona o zaštiti i spašavanju i problem regionalne sanitarne deponije, kao i druge teme.

Upravo su ovo gorući problemi sa kojima se susreću opštine USK, a koje će načelnici i gradonačelnik pokušati riješiti zajedničkim djelovanjem prema višim instancama.

Problem naše Opštine i dalje je Zakon o šumama, i nepoštivanje presude Ustavnog suda Federacije BiH. Načelnik Hujić je još jednom ponovio da se nepravda prema našoj lokalnoj zajednici mora ispraviti.

“Najvažniji zaključak je taj da imamo apsolutnu podršku 7 načelnika USK-a, vezano za naše zahtjeve oko donošenja Zakona o šumama, obzirom na Javnu raspravu koja je u toku i traje do 15.marta”, kazao je načelnik Hujić.

Krajiški načelnici su razgovarali i o statusu regionalne deponije. Saglasni su da je krajnje vrijeme da se projekat pokrene s mrtve tačke. Za naredni sastanak bit će pripremljena cjelovita informacija o statusu projekta, sa aspekta odabira lokacije, cijene izgradnje deponije i odvoza smeća za svaku opštinu USK-a.

Naredna sjednica u istom sastavu, održat će se 9.marta, u Cazinu.



Kolegij načelnika USK-a

Nezavisni načelnici i gradonačelnik u Bosanskom Petrovcu

Dana 4.2.2017. godine u našoj Opštini održan je sastanak sedam nezavisnih načelnika i gradonačelnika, čiji je domaćin bio načelnik Zlatko Hujčić.

Ishod sastanka je prva Proklamacija koju su potpisali načelnici općina Bosanski Petrovac, Zlatko Hujčić, Stari Grad, Ibrahim Hadžibajrić, Visokog, Amra Babić, Bužima, Zikrija Duraković, Kalesije, Sead Džafić, Goražda, Muhamed Ramović i gradonačelnik Zenice, Fuad Kasumović.

“Mi ovo smatramo kao šansu koja nam se desila, kao jednu mogućnost za neko bolje sutra. Wigemark nam daje podršku upravo u ovakvom statusu. Mi ćemo se boriti da opravdamo povjerenje naroda. Svjesni smo da nas čeka velika borba, a mi smo dovoljno jaki da uspijemo”, rekao je načelnik Hujčić.

Pozvali su na saradnju sve druge lokalne zajednice u BiH, sve institucije na svim nivoima vlasti, te posebno poslovnu zajednicu, organizacije civilnog društva, diplomatske misije i međunarodne organizacije.

Između ostalog, u Proklamaciji se navodi da su potpisnici opredijeljeni zadržati svoj nestranački i nezavisni status.

Kako je navedeno, posebna pažnja će se posvetiti zajedničkim projektima od prioritetnog značaja za vlastite lokalne zajednice, a cilj je stvoriti što bolji ambijent za sve građane, otvoriti radna mjesta, čuvati javna dobra, poštivanje zakona cijele Bosne i Hercegovine.



Nezavisni načelnici u kabinetu načelnika Hujčića

Wigemark pružio podršku nezavisnim načelnicima

Ambasador Evropske unije u Bosni i Hercegovini nj. e. Lars-Gunnar Wigemark, pozvao je 31. januara na radni sastanak nezavisne načelnike/gradonačelnike FBiH.

Sastanak je održan u rezidenciji Evropske unije u Sarajevu, a razgovaralo se o lokalnoj samoupravi, mogućnosti razvoja i sistematskog uređenja lokalne

samouprave u skladu sa Evropskom poveljom o lokalnoj samoupravi, aktuelnoj političkoj situaciji u Bosni i Hercegovini i reformskoj agendi.

Nj. e. Wigemark je iskazao podršku nezavisnim načelnicima/gradonačelnicima iz FBiH.

Radnom sastanku kod nj. e. Wigemarka prisustvovali su: načelnica Općine Visoko, Amra Babić, načelnik Općine Stari Grad, Ibrahim Hadžibajrić, gradonačelnik Zenice, Fuad Kasumović, načelnik Općine Goražde, Muhamed Ramović, načelnik Općine Kalesija, Sead Džafić, načelnik Općine Bužim, Zikrija Duraković i načelnik Općine Bosanski Petrovac, Zlatko Hujčić.



Nezavisni načelnici kod Wigemarka na sastanku

Na sastanku kod Wigemarka

Na sastanku koji je održan 21. februara u Sarajevu, a kojeg je organizovao Ambasador Lars-Gunnar Wigemark, šef Delegacije Evropske unije u Bosni i Hercegovini i specijalni predstavnik Evropske unije u Bosni i Hercegovini, pored načelnika Hujčića, prisustvovalo je 20 ambasadora.

Riječ je o konstruktivnoj diskusiji, gdje je bilo govora o podršci pokreta nezavisnih načelnika, a sve to u svjetlu predstojećih izbora.

Wigemark je, vodeći se misijom da naša država treba da bude jedinstvena, miroljubiva, prosperitetna i buduća država članica Evropske unije, ovim pozivom potvrdio podršku nezavisnim načelnicima u kojima vidi bitne aktere u njenom ostvarenju.

Susret sa Inckom

Načelnik opštine B. Petrovac, 16. februara je, u Bihaću, razgovarao sa visokim predstavnikom EU, gospodinom Inckom, kojom prilikom ga je upoznao sa aktualnim stanjem u našoj opštini.

Tokom jednosatnog razgovora, načelnik je bio prijatno iznenađen poznavanjem opšteg stanja u opštini, od strane gosp. Incka. Bilo je govora o aktuelnim i budućim projektima, za koje je rekao da su zaista životni. Tu se, prije svega, navodi postavljanje kolektora (prečišćivača), za otpadne vode i novoizgradjenu kanalizaciju, zbrinjavanje socijalno ugroženih, izgradnju infrastrukture, elektrifikacija, širenje vodovodne mreže, kao i nova zapošljavanja. Dolaskom Binga, Alma Rasa, Arifagića, kao i planiranim širenjem proizvodnih kapaciteta Pirnara, doći će do novog zapošljavanja kojim se malo koja opština može pohvaliti.

Tako je bilo govora i o problemu dodjele drzavnoga zemljišta poljoprivrednim proizvođačima, odnosno vlasnicima stoke, za ispašu. Nedavno je, naime, završen javni poziv za dodjelu stotina hektara neobradjenog zemljišta, na području MZ Krnjeuša, na koji su se javila dva subjekta. Ogromna su prostranstva godinama neobradjena, znači s vrlo malo uzoranih površina i namjera je da se konačno krene s značajnijom ispašom, obimnijim radovima, i naročito proizvodnjom zitarica.

U tom cilju je Vlada FBiH, dana 1. decembra 2016. godine, donijela Zaključak kojim se zadužuju lokalne zajednice da „preduzmu sve mjere i radnje, iz svoje nadležnosti, da zapušteno poljoprivredno zemljište, vrata poljoprivrednoj proizvodnji“.

Ono što je sada najvažnije jeste raditi brzo na izvršavanju ovih zaključaka, jer su mnoge godine izgubljene, što je neoprostiv apsurd, obzirom na bogatstvo ovog našeg resursa, koji nije ništa manje vrijedan od šuma. Gospodin Incko je izrazio punu podršku ovim namjerama, te svaku pomoć u okvirima svojih nadležnosti.

Na kraju je visoki predstavnik obećao posjetiti našu opštinu, koja će biti domaćin svih načelnika ovog kantona, s zajedničkim temama, ali u njegovom prisustvu.



Načelnik Hujčić sa Inckom

Dan Općine Bužim

Dana, 20. februara u Velikoj Sali JU „Centar za kulturu, sport i informisanje“ u Bužimu, održana je Svečana akademija i Svečana sjednica Općinskog vijeća povodom Dana Općine Bužim, na kojoj su pored domaćina Bihaća, načelnice Visokog, načelnika Starog Grada Sarajevo, Kalesije, Cazina, Kočevje (Republike Slovenija), prisustvovao i načelnik Opštine Bosanski Petrovac.

Svojim prisustvom načelnik Hujčić je u ime građana naše Općine, uposlenika organa uprave i u svoje lično ime uputio iskrene čestitke povodom obilježavanja Dana Općine Bužim, te je ovu priliku iskoristio na jačanju međuopćinske saradnje i zajedničkog djelovanja u podsticanju razvoja i unapređivanja naših lokalnih zajednica.

Delegacija Južnobačkog okruga u posjeti našoj Opštini

Dana, 9.2.2017. godine, načelnik Zlatko Hujčić je u Maloj Sali primio načelnika Južnobačkog okruga Republike Srbije, gospodina Milana Novakovića, zajedno sa njegovim saradnicima.

Ovaj susret je rezultat saradnje, koja je uspostavljena prošle godine u aprilu posjetom načelnika Grahova, Glamoča, Drvara i naše Opštine.

Na jučerašnjem sastanku, načelnik Hujčić je u razgovoru naglasio mogućnosti i potencijale naše Opštine, napomenuvši i probleme sa kojima se susrećemo.

Naime, cilj ove posjete je darivanje osnovnoškolaca paketima sa školskim priborom, te je upriličena i posjeta Osnovnoj školi „Ahmet Hromadžić“. Tokom obilaska škole, uručen je laptop i lopta direktorici Mujesiri Kavaz.

Na kraju druženja, osnovci petog razreda su se predstavili recitacijom „Ovo je Bosanski Petrovac“, nakon koje su prisutni bili vidno oduševljeni.

Potom je uslijedila posjeta Srpskoj pravoslavnoj crkvi, gdje je domaćin bio Episkop Atanasije koji se zahvalio na donacijama u školskom priboru učenicima osnovnih škola zapadno krajiških opština, Grahova, Glamoča, Drvara i naše Opštine, koju su učenici osnovnih škola opština Južnobačkog okruga sakupili.

Oduševljenje nije izostalo ni obilaskom bosanskopetrovačkom Domu kulture, a naročito Muzeju Jovana Bijelića, gdje je domaćin bila direktorica Milica Kecman.

„Zahvalnost i obostrano zadovoljstvo rezultat je posjete, i nadam se da će se ovakvi susreti nastaviti u budućnosti, jer ipak korijeni pripadnosti naših ljudi koji žive u Srbiji i šire, govore o pravoj vrijednosti ovih područja“, rekao je načelnik Hujčić, koji je uputio poseban pozdrav gradonačelniku Novog Sada, gospodinu Milošu Vučeviću.



Delegacija iz Južnobačkog okruga u maloj Sali naše Opštine

Javna rasprava o Nacrtu Zakona o šumama FBiH

Unsko-sanski kanton je prvi kanton na teritoriji FBiH na kojem je održana Javna rasprava o Nacrtu Zakona o šumama FBiH, a nakon što je Dom naroda Federacije BiH isti uputio u proceduru.

U Sali Skupštine USK, u prisustvu Šemsudina Dedića, federalnog ministra poljoprivrede, vodoprivrede i šumarstva FBiH, čije ministarstvo je i predlagač ovog zakona, zatim kantonalnog ministra Dragana Polimanca, predstavnika ŠPD „Unsko sanske šume“, Kantonalne uprave za šumarstvo, Privredne komore USK, načelnika Općine Ključ, Nedžada Zukanovića i drugih zainteresiranih lica, Općinski načelnik Zlatko Hujić je iznio i obrazložio primjedbe i prijedloge na Zakon, a koje se uglavnom odnose na veću naknadu od korištenja šuma, zatim pravedniju raspodjelu od dobiti, ravnopravnije učešće ove lokalne zajednice u upravljačkim strukturama šumskog privrednog društva, kao i druge primjedbe koje se direktno tiču provedbe ovog zakona na teritoriji naše Općine.

Na kraju izlaganja, Općinski načelnik je istaknuo da, iako svestan da se radi o političkom pitanju, u prvom redu ovaj zakon treba da bude odraz moralnog odnosa države prema lokalnim zajednicama, još jednom naglašavajući, a čime su se složili i svi prisutni, da je dosadašnji odnos vlasti prema Općini Bosanski Petrovac po pitanju primjene kantonalnog zakona bio diskriminirajući i nečastan.

Općina Bosanski Petrovac je iskoristila svoje pravo da, putem Saveza općina i gradova FBiH, u pisanoj formi uputi primjedbe, prijedloge i sugestije na federalni Zakon o šumama, na taj način još jednom potvrdivši svoju aktivnu ulogu u očuvanju ovog, za Bosanski Petrovac, najvažnijeg prirodnog resursa.

Javna rasprava će trajati do 15. marta, a očekuje se da bi do ljeta ovaj krovni zakon trebao biti i usvojen.



Načelnik Hujić na Javnoj raspravi u Bihaću

Sastanak Radne grupe za šume

U Sarajevu je 21. februara održan sastanak Radne grupe za šume, na kome su prisustvovali načelnici opština koje su najviše bogate šumom, s ciljem da se napokon uvažavaju interesi lokalnih zajednica, imajući u vidu da presuda Ustavnog suda nije izvršena.

Učesnici sastanka su se dogovorili koje primjedbe će uzeti kao relevantne, kao one koje se tiču svih jedinica lokalne

samouprave, naročito onih koje su bogate šumom, a spadaju u nerazvijene, kao primjedbe Saveza opština i gradova FBiH koje će biti dostavljene Federalnom ministarstvu poljoprivrede, vodoprivrede i šumarstva i Vladi FBiH.

Sastanku je pored načelnika Hujića, prisustvovao i Mile Marčeta, delegat u Domu naroda Parlamenta Federacije.

Konferencija „Regija za turizam, turizam za regiju“

Dana 26.1.2017. godine u Beogradu je održana VIII konferencija koju je organizovala poslovna asocijacija „Biznis plus“ u saradnji sa Ministarstvom trgovine, turizma i telekomunikacije Srbije.

Konferenciji su prisustvovali predsjedavajući Predsjedništva Bosne i Hercegovine Mladen Ivanić i potpredsjednik Vlade i ministar turizma, trgovine i telekomunikacija Rasim Ljajić, te zamjenik predsjedavajućeg Vijeća ministara BiH i ministar spoljne trgovine i ekonomskih odnosa BiH Mirko Šarović, i ostali zvaničnici kako iz naše države, tako i iz Srbije, kao i načelnik Hujić, po pozivu direktora „Biznisa plus“.

Cilj konferencije je promocija turizma u regiji, ali i uspostavljanje boljih veza između turističke djelatnosti, kao jednog od nosilaca razvoja, sa ostalim privrednim granama.

Na konferenciji je istaknuta i važnost kreiranja novog imidža balkanskog regiona, koji više neće biti mjesto sukoba, nego prosperiteta i dobre turističke ponude.

Na prvom panelu, posvećenom poziciji turizma regije na svjetskoj turističkoj mapi i značaju umrežavanja sa trgovinom, građevinskom industrijom i telekomunikacijama, govorili su Rasim Ljajić, potpredsjednik Vlade Republike Srbije i ministar trgovine, turizma i telekomunikacija, Mladen Ivanić, predsjedavajući Predsjedništva BiH, Miroslav Miletić, potpredsjednik Privredne komore Srbije, Ahmet Egrlić, potpredsjednik Vanjskotrgovinske komore BiH, Mirsad Jašarspahić, potpredsjednik Privredne komore FBiH, te Edin Dilberović, direktor Direkcije za evropske integracije BiH i Goran Svilanović, direktor Regional Cooperation Council.

Tokom drugog panela učesnici su razgovarali o mogućnostima povezivanja turizma u regionu sa ciljem privlačenja turista iz cijelog svijeta i poboljšanju turističke ponude, smještajnim kapacitetima i novom konceptu gradnje i finansiranja, te dobavljačima i infrastrukturi kao preduslovu za bolje turističke ponude.

Kako bi zemlje našeg regiona privukle što veći broj turista sa dalekih destinacija, neophodno je da na tržište izađu sa zajedničkim proizvodom. Volja za saradnjom postoji – zaključeno je na osmoj konferenciji „Regija za turizam, turizam za regiju“.



Načelnik Hujić na Konferenciji u Beogradu

Prkosi nisu zaboravljeni

Opština Bosanski Petrovac je 2014 godine zajedno sa UNDP i Regionalnim Razvojnim servisom – RRS Drvar realizovala projekat „Elektrifikacija sela Prkosi putem solarnih panela“.

Funkcionisanje sistema je uslovljeno akumulatorima čiji je životni vijek ograničen. S obzirom da se radi o stanovništvu Prkosa koji nisu u mogućnosti da sami nabave nove akumulatorne, opština je preuzela na sebe obavezu nabavke adekvatnih akumulatora, s ciljem da se sistem osposobi, čime bi stanovnici imali minimum električne energije za osnovne potrebe.

Dana 22.2.2017. godine, izvođač firma „Energoinvest-Sue“ d.o.o. Sarajevo je na Prkosima izvršila postavljanje i stavljanje u funkciju novih akumulatora za solarne sisteme.

Cilj ovog projekta je omogućiti povratnicima život koji je dostojan svakog građanina, a pogotovo što se radi o korisnicima starije životne dobi.

Na licu im se moglo vidjeti zadovoljstvo, a ponajviše radost jer nisu zaboravljeni.

„Sada će bolje biti, zadovoljan sam, kad već trenutno ne postoji druga mogućnost. Nadati se da će se iznaći neko trajno rješenje“, rekao je Kovačević Stevo sa osmjehom, uz odobravanje bolesne supruge.

Opštinska administracija u proteklih nekoliko godina aktivno radi na elektrifikaciji povratničkih naselja.

„Naše opredjeljenje je bilo da ovim ljudima stvorimo uslove da normalno žive, a život bez električne energije je težak. Ovi ljudi do sada su živjeli pod svijećama, ne zbog svoje krivice.“

Potrebno je naglasiti da je nabavka akumulatora implementirana u saradnji naše Opštine i Ministarstva za izbjegla i raseljena lica Republike Srpske, u okviru Ugovora o realizaciji projekta infrastrukture kojim se nastoji riješiti problem ovog povratničkog naselja. Ukupna rijednost nabavke je 24.000,00 KM, Ministarstvo RS je učestvovalo sa 10.000,00 KM, a naša Opština sa 10.000,00 KM.



Bračni par Kovačević

Realizacija još jednog projekta

U okviru organizacije PRO-Budućnost, sa kojom saraduje i Fondacija Mozaik, dana 26.1.2017. godine je u maloj Sali potpisan ugovor sa neformalnom grupom iz naše Opštine.

Potpisivanju su prisustvovali pored predstavnice Mozaika, članovi radne grupe PRO- Budućnost, neformalne grupe, kao i član MOBA (Mreža omladinskih banaka).

Naime, ovim ugovorom članovima neformalne gupe, na čelu sa koordinatoricom Milicom Latinović, dodijeljena su sredstva od 2000 KM, za projekat „Igraj košarku i budi sretan“, koji će se od marta implementirati u našoj Opštini.

Pored aktivnosti koje su karakteristične za ovaj projekat, druženje, udruživanje, te nota pomirenja ovaj projekat nosi i dio koji je posvećen sportu, a to je košarka, što i govori sam naziv projekta.

Projekat „Igraj košarku i budi sretan“ odobren je u okviru Četvrtog poziva za PRO-Active fond, koji je bio otvoren od 19. septembra do 26. oktobra prošle godine. Na poziv je stiglo 79 prijedloga projekta koji su potraživali ukupno 130.790,03 KM, a odobrena su 54 projekta.

Ovim projektom petrovačka neformalna grupa je zamislila da mladima prenese teoretske i praktične viještine iz košarke. Na samom kraju aktivnosti grupa će organizovati turnir, a tokom projekta predavanja i posjetu vjerskim objektima u našem gradu, kao i prijateljske utakmice sa mladima iz Drvara i Sanskog Mosta.

Dokaz je ovo da bosanskopetrovačka omladina aktivno radi na unapređenju boljih odnosa, te da se na njih itekako može računati u izgradnji bolje budućnosti.



Bosanskopetrovačka omladina u realizaciji još jednog projekta...

Edukacija na temu „Nenasilna komunikacija“

Dana 2.3. 2017. godine u Vijećnici Opštine Bosanski Petrovac, organizovana je edukacija na temu „Nenasilna komunikacija“, koju je organizovala neformalna grupa mladih iz Bosanskog Petrovca, u okviru projekta „Igraj košarku i budi sretan“, kojeg podržava PRO-Budućnost.

Predavanja o nenasilnoj komunikaciji sa velikom pozornošću služalo je 50 mladih iz naše Opštine.

„Ovakav projekat je iznimno značajan za našu zajednicu, iz razloga što je ovo prvi put da mladima koji se bave sportom želimo približiti važnost nenasilne komunikacije“, rekla je Milica Latinović, koordinatorica projekta.

Predavanju je prisustvovao i Adnan Družić, najmlađi Opštinski vijećnik, aktivista i mladi PRO-Budućnost mirovnjak koji nije krio zadovoljstvo druženja sa omladinom.

„Današnje predavanje je još jedan dokaz kako je projekat PRO-Budućnost koristan za Bosanski Petrovac, drago mi je da mladi iz naše zajednice žele da uče o procesu pomirenja i zajedništva koje je neophodno u Bosni i Hercegovini“, poručio je Družić.

Između ostalih, predavanje je pratila i delegacija iz Sarajeva, predstavnici Fondacije Mozaik, koji su pokazali oduševljenje entuzijazmom bosnaskopetrovačke mladosti.

Aktivnosti se nastavljaju završno sa košarkaškim turnirom koji će se održati 25. marta.



Učesnici edukacije ispred zgrade Opštine

Svetosavska akademija

Dana 26.2.2017. godine, u prostorijama Doma kulture održana je Druga Svetosavska akademija pod nazivom „S ljubavlju Svetom Savi, Bogu i rodu“.

Na početku svečanosti prisutnima se obratio profesor pravoslavne vjeronauke, Predrag Vujić, koji je uputio dobrodošlicu, te je kratko predstavio program koji slijedi. Istakao je da su Svetosavsku akademiju pripremili učenici Mješovite srednje škole „Bosanski Petrovac“ i osnovne škole „Ahmet Hromadžić“, te da je sama Akademija nastala kao plod želje i entuzijazma učenika i njihovih vjeroučitelja da svoju ljubav prema vjeri i prema zajedništvu pretoče u stihove, recital, besjedu, pjesmu i igru.

Prisutne je pozdravio i načelnik Zlatko Hujčić, zaželivši sretan praznik, istakao je da je ponosan zbog ovakvih

dešavanja, te da širenje ljubavi i entuzijazma uvijek treba podržati. Načelnik je posebno naglasio potrebu njegovanja ovakvih događaja, radi poštivanja i očuvanja identiteta svih naroda u ovoj zemlji.

U prepunoj sali Doma kulture gdje su bile okupljene sve generacije, učenici su uspjeli na jednostavan i zanimljiv način oživjeti lik i djelo prosvjetitelja Sv. Save na radost svih poštovatelja ovog velikana pravoslavne vjere.

Brojni građani velikim pljeskom su nagradili svaku tačku programa, a njihovo zadovoljstvo svjedoči kako je u našoj opštini potrebna i dobrodošla svaka prigoda da se uživa u kulturnim i duhovnim vrijednostima, te da se pošalju poruke mira, ljubavi i sloge.



Brojni posjetioci na Svetosavskoj akademiji



Narodna nošnja, pjesma i veselje...



Svoj talent su iskazali i glumom...

6. po redu...

„Grmečki marš“

Pod pokroviteljstvom Planinarskog saveza Republike Srpske, a u organizaciji Zavičajnog udruženja Sanjana „Grmeč“ i Planinarsko alpinističkog kluba „Banja Luka“, 5. 2.2017. godine održan je „Grmečki marš“- u pomen borcima NOR-a koji su slomili Četvrtu ofanzivu fašističkih snaga na tadašnju slobodnu teritoriju NOP-a u Podgrmeču, februara 1943. godine.

Naime, slamanje Četvrtu ofanzive fašističkih snaga doprinijelo je oslobađanju Sanskog Mosta, Grmeča i Podgrmeča, oktobra 1943. godine i svih naroda i narodnosti koji su živjeli i žive na tom području.

S obzirom da se Marš održava 6. put po redu, manifestacija već poprima tradicionalni karakter, što je i u cilju samog Zavičajnog udruženja, ali i svih poštivalaca pomenutog događaja.

Marš je realizovan rutom selo Bravsko-Crni vrh 1605 metara nadmorske visine uz učešće oko 200 ljudi.

Nakon rute, u MZ Bravsko je organizovan predah uz ručak za članove udruženja, na kojem je prisustvovao i načelnik Zlatko Hujic, podržavajući ovu manifestaciju naveo je i činjenicu da se antifašistička borba, koja je i počela na našim krajevima, i dalje neprestano vodi.



„Grmečki marš“

Novogodišnji uspon na Osječenicu

I ovu godinu planinari sa područja Unsko-sanskog kantona započinju sa Novogodišnjim usponom na Osječenicu. Članovi planinarskih društava sa USK-a ali i iz drugih dijelova naše domovine, njih 120 ovu planinarsku sezonu započeli su na planini Osječenici pored Bosanskog Petrovca.

Domaćin ove manifestacije je KES „Crni vrh“ iz Bosanskog Petrovca.

Ove godine ruta uspona je počinjala sa Oštrelja odakle se autima došlo do okretaljke na 13. kilometru a dalje

pješice preme osječeničkom vrhu. Jak vjetar na vršnoj čistini uz padanive snijega nije spriječio planinare da vrh Osječenice još jednom upišu u svoje planinarske dnevnik.

Najmlađi učesnik ovog pohoda je bio sedmogodišnji Amel iz Cazina. Zanimljivo je napomenuti da neki od planinara vode precizne podatke o broju uspona na Osječenicu pa je tako kladušaninu Šefiku Sadikoviću ovo 63. uspon na ovu planinu.

Novogodišnji uspon na Osječenicu je postao sada svojevrsan planinarski brend koji ima za cilj promociju prirodnih ljepota petrovačkog kraja i planinarenja kao sporta. Druženje planinara nakon uspona je nastavljeno u prostorima SRC Oštrelj gdje su posluženi topli čajevi i ručak za vesele planinare.



Učesnici pohoda na Osječenicu

SANEL GREDELJ ODBRANIO DOKTORSKU DISERTACIJU

U subotu, 21. januara u amfiteatru Tehničkog fakulteta Univerziteta u Bihaću održana je odbrana doktorske disertacije našeg sugrađanina Sanela Gredelja na temu „Istraživanje utjecaja vibracija obradnih sistema na stohastično i haotično ponašanje procesa obrade.“ Iza složenog naslova ove disertacije krije se kruna Sanelovog naučnog rada i akademske karijere, kao i najveća nagrada za njegovu predanost učenju i upornost u stalnom pomicanju vlastitih granica.

Pred nekoliko desetina prisutnih, o Sanelovoj predanosti i posvećenosti nauci je najljepšim riječima govorio njegov mentor prof. dr. sci. Milan Jurković. Profesor Jurković je rekao kako je u svojoj pedesetogodišnjoj nastavno-naučnoj karijeri imao malo takvih studenata koje nijedna prepreka nije mogla spriječiti u učenju, razvoju i napretku i koji su uz akademsku karijeru uporedo izgradili zaokružen porodični život i mjesto u zajednici poput Sanela.

Sanel Gredelj je rođen 1972. Godine u Bosanskom Petrovcu, gdje je završio osnovnu školu i srednju tehničku školu. Obrazovanje nastavlja na Mašinsko-tehničkom fakultetu u Banjoj Luci gdje ga zatiče početak rata zbog kojeg je morao ostaviti studiranje za neka bolja vremena i uključiti se u odbranu zemlje u redovima Armije RBiH. Po završetku rata,

prekinuti studij nastavlja na tada novoosnovanom Tehničkom fakultetu Univerziteta u Bihaću, gdje je uspješno diplomirao 1998. godine.

Završen fakultet nije zadovoljio Sanelovu želju za znanjem i akademsku ambiciju pa tako na istom fakultetu magistrira 2005. godine da bi sad i doktorirao, te tako postao tek šesnaesti doktor nauka kojeg je proizveo bihački Tehnički fakultet i prvi doktor nauka nastanjen u Bosanskom Petrovcu nakon nekoliko decenija. Zaposlen je u MUP USK i radi kao asistent na Tehničkom fakultetu u Bihaću ali iako je uspješan i u poslu i u akademskoj karijeri, kao najveći uspjeh u životu uvijek ističe svoju porodicu – suprugu Azru i jednogodišnjeg sina Tarika.

Odbrani doktorata našeg sugrađanina Sanela Gredelja prisutvovao je i općinski načelnik Zlatko Hujić, koji je čestitao Sanelu i istakao kako će, kao i u ovom slučaju, općina uvijek naći načina da pomogne školovanje svoje djece jer je Bosanski Petrovac bio i ostao poznat kao mjesto odakle dolaze pametni, obrazovani i časni ljudi.



Sanel Gredelj, prvi doktor nauka, nastanjen u našoj Opštini, nakon nekoliko decenija, (četvrti s desna na lijevo)

U kabinetu načelnika...

Božićni prijem

U kabinetu općinskog načelnika Zlatka Hujića, 10. januara je organizovan tradicionalni Božićni prijem za predstavnike pravoslavne crkve naše Opštine.

Na prijemu su prisustvovali episkop bihačko-petrovački Atanasije i sveštenik Zdravko Bogojević.

Načelnik je ovom prilikom gostima uputio iskrene čestitke za Božić i Novu godinu, te izrazio želju da se međusobna komunikacija i saradnja i dalje nastave.

Njegovo Preosveštenstvo episkop Atanasije je izrazio svoju zahvalnost i nadu da će ovakvih prijema u budućnosti biti i više.



Na Božićnom prijemu kod načelnika

Bosanskopetrovački sportist 2016. godine: odbojkaš Faris Hujčić

Odbojkaš bosanskopetrovačke „Mladosti“, Faris Hujčić, učenik srednje mješovite škole, izabran je za najboljeg sportistu Opštine Bosanski Petrovac u 2016. godini, na svečanosti proglašenja sportiste koja se održala 15. januara, u Domu kulture.

Hujčić je dobio ovo laskavo priznanje zahvaljujući svom izuzetnom talentu, a dokaz tome je i poziv da nastupi za pionirsku selekciju naše države u odbojki u prošloj godini. Uspješno je branio boje naše zemlje na međunarodnom turniru koji se održao u Srbiji. S ponosom se nadamo da će nastaviti sa odbojkaškom karijerom i da ćemo ga i dalje gledati u dresu reprezentacije Bosne i Hercegovine.

Ovom prilikom proglašeni su i drugi laureati u sportskim disciplinama:

Milkan Mrđa, trener Karate kluba „Mladost“, proglašen je za najuspješnijeg trenera u 2016. godini. Pod rukovođenjem Mrđe karatisti i karatistkinje naše Opštine su postali prepoznatljivi po učešću na brojnim turnirima sa kojih se redovno vraćaju sa medaljama i priznanjima.

Za najbolji ženski tim proglašen je **Ženski odbojkaški klub „Mladost“**, dok je za najuspješniju mušku sportsku ekipu izabran **Klub ekstremnih sportova „Crni vrh“ - sekcija paraglajdera** - kategorija seniori.

„Ove smo godine imali lakši put u organizovanju svečanosti proglašenja najboljeg sportiste, jer su nam poslužila iskustva od prošle. Drago mi je da se tradicija nastavlja!“, rekao je Armin Mahmutspahić, predsjednik sportskog saveza Opštine Bosanski Petrovac.

Prisutnima se obratio i načelnik Hujčić koji je u svom govoru istakao da će i dalje nastaviti izdvajati sredstva za sport, navodeći činjenicu da će ove godine u budžetu za taj segment planirati više nego prošlih godina. Također, istakao je i da je ponosan na petrovačka imena svjetske slave poput Momira Kecmana i Alena Didovića.

Proglašene su i „Mlade nade Bosanskog Petrovca“ :

Bajrić Katka i Branković Anđela (karate), Smiljanić Tamara i Linić Aid (odbojka), Didović Adis i Jaganjac Muhamed-Ramo (nogomet), Grubiša Boris, Kartal Mirza i Karanović Anđelka (hrvači/rvači), Hana Zajkić i Lejla Redžić (košarka).

Najbolji pioniri: Banjac Jovana (karate) i Redžić Mirza (nogomet).

Najbolji kadeti: **Počuč Bojana** (karate) i **Eldin Mahmutspahić** (odbojka).

Najbolji juniori: **Ajla Mustafa** (košarka) i **Ismar Bolić** (nogomet).

Najbolji seniori: **Milica Latinović** (košarka) i **Irfan Arnautović** (nogomet)

Najbolji u kategoriji školski sport: osnovnoškolci, u ženskoj kategoriji dijele **Ivana Grbić** i **Marija Čulibrk**, a u muškoj, Kenan Družić.

Srednjoškolci: **Elvira Alić** i **Voislav Grubiša**.

Zahvalnicu za podršku sportu dobila je **Fondacija Mozaik** koja je u našoj Opštini finansirala projekte vezane za sport.

Zahvalnice sportskim radnicima: **Ismet Alić** (Odbojkaški klub)

Priznanja pojedincima: **Husetić Safet** (Nogometni klub), **Muratović Fikret** (Biciklistički klub), **Kecman Momir** (Borilački sport).

Specijalne nagrade pojedincima: Zajkić Ibrahim, istaknuti sportski radnik, Mahmutspahić Nermin, trener mladih odbijkaša, Tešnjak Hazim, dugogodišnji trener nogometaša.



Načelnik Hujčić sa bosanskopetrovačkim sportistom godine Farisom Hujčićem



Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

**Slušajte Radio Bosanski
Petrovac od 15:00-17:00,
svakim danom na 90.9 MHz fm**